

第六一四冊

理學彙編

學行典

孝弟部

二六—三九
(卷)

古今圖書集成

中華書局影印



古今圖書集成

中華書局影印

欽定古今圖書集成理學彙編學行典

第二百八卷目錄

孝弟部名賢列傳三十

明十六

董時彥 錢維垣 劉悌 楊榮春 艾春 潘世寶 張國鼎 王燭 梁鉉 馮琛 陸洪 陳伯道 李仕開 子孝蒙 忠諫 葉府 林桂 陳榮 許瓏 馬扁 董淑 王應麒 葉宗可 夏道昌 徐肅 鄭濂

董時彥 王宗昌 薛士珩 俞肇乾 王大豫 李澤 梁垣 呂亨寧 馮象臨 梁焯 周士贊 陳良言 陳敬 董儒 李訥 周黼 薛淋 俞敏德 孫文原 謝矩 鮑倫 王應瑞 湯天祥

王化民 楊洋 樊迪 葉儼 李永明 吳一鵬 李檣 盧廷瑾 呂琅 杜挺 張銓 鄭期進 呂有音 葉弘淵 樓景明 楊彥 黃鍾 葉瀚 盛君協 葉維翰 黃道琳 戴天倫 張崇翰 王欽穆 薛必光 蘇祀 葉世愛

鮑知仲 子坤順 李侃 李大夏 朱淡 葉琮 潘沆 盧鶴鳴 黃鐸 周豪 從子欽 蔣鵠 高文祖 單槐 徐鼎臣 馬璉 鄭友仁 呂仲珉 徐思 王一柱 王世明 周尚穆 余夢龍 南孟明 張芝芳 朱元旻 季養 姜約 弟綱 章友善

陳厚 謝孝章 何小二 謝廷俊 趙漢規 項愛親

學行典第二百八卷

孝弟部名賢列傳三十

明十六

錢維垣

按寧波府志錢維垣字元甫邑諸生事祖至孝父僉事照早卒伯素封季亦蚤達然其祖獨安孤孫養朝夕愉愉若不知仲之早世比八喪悞折足臥牀第間維垣躬率繼婦任氏晨昏服勞凡盥櫛七著廁踰浣濯之類必躬親之如是者十有三年有司旌其閭

董時彥

按寧波府志董時彥字叔元年十一喪母隨喪父繼母龔氏頗不能安時彥朝夕泣有母在彥生母去彥死之語事無鉅細必請命而行稍有拂意必多方勸慰俟色愉乃已母嘗病疽幾瀕于危時彥吮之至再獲痊

劉悌

按寧波府志劉悌字崇義天性孝友座右嘗書色難二字以自省家中落而二親目雙瞽悌率其婦宛轉

扶掖之自服御几杖及吐壺穢器必手自澣滌甘旨
滄瀛穰然並陳父先卒與母同臥起有所患苦必曲
承之或中夜不寐呼之即十起不倦後貧苦日甚事
之愈謹忽一旦遽疾先母卒卒之日促從兄扶至別
室曰奈何死母寢所兄扶掖出目始瞑

王宗昌

按寧波府志王宗昌字文在事二親孝已養不倦父
病痢調侍湯藥衣不解帶者月餘及疾劇甘以身代
刲股和藥餌以進因得瘥母老病瘋扶持起居二十
餘年不少懈執喪哀毀幾於減性廬墓有白鳥翔集
之異人謂至孝所感云

楊榮春

按寧波府志楊榮春字元苞邑諸生至性過人母亡
哀毀骨立口不沾糜者旬日讓遺產于二弟仲弟膺
里役蝕糧百餘金幾斃獄為罄已產代償之

薛士珩

按寧波府志薛士珩字長璵司馬三才長子性謙謹
少與仲父宗伯三省郡守王衡觀察謝渭讀書才質
相頡頏三人皆先後獲雋而士珩以明經不就選并
以任子讓其弟士龍三才卒於京邸聞訃勺水不入
口哀毀骨立扶輿歸終制足未嘗一履內室遇諱日
必嬰兒泣至老猶如是祖母病索朱櫻不可得而卒
嗣後見朱櫻即泣然淚下終身不食事母孝司馬卒
後奉之尤謹或有他怒則長跪終日晚年構園於北
郭以隱惟寄情經史自娛點次者幾充棟年八十二
卒學者私諡之曰孝定先生

艾春

按寧波府志艾春字德元甫生三月而孤母耿氏時
時抱遺孤痛哭至喪明備嘗艱苦鞠育有成春念母
恩志圖終養母曰先人捐性命策功勳爾乃斬然棄
乎春涕泣曰敢不唯命遂勉襲指揮職當道知其才
舉任把總者四春痛母之盲不欲遠違定省晨夕供
奉未嘗委人母病癰為吮之服藥而愈及居喪哀毀
骨立乞終養既葬廬于墓側亡何日本來貢道定海
當道委春視衛篆春不得已服衰治事制馭有方終
無忘蓼莪之思至今人稱艾孝子云

俞肇乾 潘世寶 王大豫 張國鼎

按寧波府志俞肇乾母鄭氏病篤割臂煎湯以進病
良已有司給布粟旌之仍月給粟養其母又有潘世
寶王大豫張國鼎亦定海人皆嘗刲股以愈親病為
有司所旌

李澤

按寧波府志李澤字禹施為邑庠生家居謹厚周飭
言論恂恂樂赴人之急事母竭其孝敬兄弟五人萬
然有棠棣風母病醫藥弗效諸子各禱於神誓以身
代又弗愈澤刲股和藥以進乃愈將舉德行忌者非
之澤喜曰澤欲生母而非中道茲正所以教澤也

王炯

按寧波府志王炯號濟川諸生事二人甚謹母病三
年湯藥必先嘗乃進處兄弟式好無尤兄煥官於桃
源運糧被火即捐貲代償性好施予周貧恤孤里人
被其德者甚衆壽八旬卒

梁垣

按寧波府志梁垣字令吹成童遊庠昆弟四人有棣

萼之好父得奇疾閉結腹漲為口吮之病遂以起父
曰若兄弟四而獨任晨昏乎對曰兒知有親不知兄
弟可分也既而季氏疾瘵父傾貲營療或以為偏則
曰父之於子猶四肢一股負痛必急救之非偏於一
情固然也卒年八十二

梁鉞 呂亨寧

按寧波府志梁鉞字韻寶事親能察色先意承志母
卒葬祭竭情寢食必與父俱謂其昆弟曰有父子處
而子安於室者哉歲辛卯偕父入郡城父得寒疾浸
劇鉞衣不解帶彌月每市藥問醫所過廟必叩首祈
禱願以身代號跪致誠醫為動色父乃獲全而鉞之
精力瘦矣抱疾侍父歸值兄又病因鉞日咨求療禱
反似己非重荷者匝旬而溘逝所藏止父書其內之
簪珥咸為公家罄苦心陰劑至是家人始識焉同時
有呂亨寧者字伯清同產四人友于無間叔疾圖所
以生其兄為文告諸幽冥願以身代已而叔瘳已忽
病羸惚惚三載一日夢青衣者促之行曰汝已許之
矣遂沒人皆哀之

馮琛

按寧波府志馮琛父景祚高年失明在牀褥者十五
年琛事之始終惟謹家雖貧必備甘旨惟所欲進之
里人王司空子鐸輕財好義素重琛延之家塾每有
珍味輒不食鐸覺必先餽其父然後食父有老婢臥
病為奉湯藥如事所生或訝之琛曰吾父存時賴渠
周旋始得間以授徒養吾父若忘之是忘父也吾豈
忍哉知縣賈寅重其行欲疏以聞琛曰此子行之常
耳可望褒錫乎力辭之

馮象臨

按寧波府志馮象臨字大引邑諸生父任爲工部主事時邸舍火作夜已昏靜象臨驚起覓父母時烟焰滿室迷失庭戶象臨排門大呼初得母遽從火中負出再入負父挾一九歲弟併獲父所佩牙牌時已半體焦爛有女弟尚畱臥內未出母號呼將自入亟止之身觸烈焰入而復出遂灼爛而死時年二十三女弟亦死於火事聞旌表

陸洪

按寧波府志陸洪字德宏爲縣諸生母歿奉柩合葬畢卽結廬於側參政桂謙按部廉其事奏旌其門提學鄭紀以詩獎之

梁煒

按寧波府志梁煒字孟雅父棟材好義樂施以行誼稱於鄉三歲喪恃善事繼母寒暑饑飽自喻惟恐明言以傷父心撫異母諸弟極其周摯分產取其瘠者故終身得二人懽性耿介寡言虛懷敦朴惡道人之過人有一行之善極口揚之年未艾輒棄諸生不就試人益高之

陳伯道

按寧波府志陳伯道邑諸生陳某小妻所出也嫡母生二子伯道事嫡與二兄唯謹父死嫡與二兄逐伯道母出令再醮不得已他適伯道入而泣則異嫡母出而泣則畏二兄第旦夕掩衾雪涕枕席間涕痕斑斑也比母後夫卒伶仃無倚伯道乃稱貸贖之歸卽食貧必具甘旨以進里中嘖嘖稱純孝云

周士贊

按寧波府志周士贊號慕齋旋之子也生平言動不苟事父母寢膳必謹父病調奉湯藥弗離左右焚香顧天願以身代比易簣呼踰號慟絕而復甦事母與所生母甘旨色養務得懽心鄉里稱孝焉仲子早世遺孤四人長名夢德孝弟謹信克肖其祖家貧棄舉子業朝夕拮据以事孀母撫弱弟且爲擇師傳所置產業悉以公諸弟秋毫無所私年六十二卒今其子姓繁衍多致通顯咸謂其孝友之報云

李仕開 子孝謙 悌謙 忠謙

按寧波府志李仕開鄞人操履方正鄉曲有爭必往質之時方驛驛閉門不妄交惟善武林楊壽陸德賜金華戴良末嘉高明慈谿胡舜咨令子弟稟學焉三子長孝謙次悌謙次忠謙少孝友根於天性依依親側弗忍斯須去兄弟怡怡有事兄必先弟而弟恆代兄行孝謙十歲知綴文二弟九明銳嗜學親察蹙額聚謀分走東西求醫藥旦夕迭侍牀下親食後食親或旬日未食則水飲充腹而已終弗御匕箸母得末疾疾作必仆地欲死卽禱以身代良久乃蘇以爲常郡國造戰艦官以仕開富室率衆編戶成之既成使者驗艦苦窳坐法送獄秋官時孝謙弱冠請代父囚

陳良言

按寧波府志陳良言字志行副使槐之子也天性至孝幼時善承顏色行坐不離側稍長竭誠事養父患目障醫藥不效良言以舌舐之旬日卽愈母得瘋疾七年不能起良言親身抱扶便溺浣濯皆躬事之疾已方止念父母年邁恐有不測嘗臥於牀側外扇其戶及卒哀毀骨立伏苦三載既葬復廬墓三年絕不入私室父櫬在堂值憐家失火將及於櫬望北號呼忽反風而火滅居室嘗有雙鵲哺雛巢其上及貓相乳之異鄉人咸以爲誠孝所感云

葉府

按寧波府志葉府字孔修事親篤孝造次不敢離左右父患肺病思飲太白泉府晝夜踰山冒險必致之病後沈疴諸藥莫能療情甚迫感思古有割股事遂焚香籲天爲之和藥以進父病頓愈得以壽終及其喪哀毀踰禮結廬墓側哀經不除三年如一日人以爲難縣令王文貢匾其居曰孝義

陳敬

按寧波府志陳敬奉化人年十三家貧業樵一日隨父入山虎攫其父去敬即攘臂大呼疾追及之乃履其尾而以杖擊之虎怒舍其父囓敬啖之父屍賴以全鄉人哀而誄焉

林桂

按寧波府志林桂字士英鄞人以貢訓導舒城金谿二學陞遼府紀善進右長史天性孝友分俸養親嘗構亭以娛父植槐為廡橋而復生人以為異兄華得危疾涕泣求醫果得異方一藥而愈恬淡寡欲年八十八而卒

董儒

按寧波府志董儒象山人父病醫禱弗效乃籲天剖股以進父疾遂瘳上官俱優獎焉

陳榮

按寧波府志陳榮字仁夫象山人性至孝父母疾不復言笑先丁內艱哀毀骨立終三年不入內事繼母尤謹母感之亦視若己出二弟貧甚父憐之凡服食器用榮必倍易與二弟均之一日自館歸省見道遺一布襖啓之則白金二封也坐待其主歸之後貢授政和司訓雅稱師模屢見優獎居二年卒於官

李訥

按寧波府志李訥字宗厚性孝友伯兄無子依弟以居事之惟謹及卜父塋將附兄於左堪輿家以孤寡同壙不利子嗣為言乃曰吾知有手足何忍使長兄千秋後無血食也卒附之仍戒子孫弗替厥祀其一子名綺能世其家孫六人名坤元者有詩文行世學者宗之號九隴先生曾孫士楷士模兄弟友讓以禮

義為家法子孫繁衍世多象賢鄉里稱之曰李氏兄弟真可謂不愧楷模矣

許瓏

按寧波府志許瓏字延璧鄞人仁孝出於天性少孤依其母戀戀無頃刻舍時出外或就塾師歸必歷舉所見聞告母母輒喜有所使唯唯而趨一日母擲竹悞中瓏暈仆地母急抱持泣瓏稍稍蘇即睜目笑語曰兒故嚇母非真暈也長極奉養問母欲必極力供具至城市有時熟鮮好味必急致之或向夜必攜一燈走三十里抵家親烹飪以進因復歷歷舉城市中事告母伺母安寢始退嘗夜歸燈滅遇神火於道瓏就神廟俯伏乞罪已而神火復送之抵家平居恆言孔門以色養為難此不假外求不費貨貨直易易耳故其母嘗言兒愛我即就乳時無二態惟願子孫亦復如是平居言動不苟室中有婢二十六而嫁仍處于也里中有大姓相構積不能解瓏一言即跪謝散去至今茅山之陽稱淳孝篤行必歸焉子元祥成進士以才俊名

周黼

按寧波府志周黼字子用象山庠生性孝友父病亟醫禱勿效黼焚香願天願以身代父病尋愈父析產多益黼田以資力學憫弟貧乏辭不受妻吳氏病革與訣曰無他囑但勿以后妻虐吾子瞑目矣黼傷其言終身不娶每設家塾教人子弟不計束脩一日鄰火延燒百餘家至黼廬風返而息人謂厚德所感

馬扁

按寧波府志馬扁西城外傭也生而篤孝日賃傭養

母時時問母所欲不計有無難易輒極力致之無以供鮮新常夜漁以充饌母得危疾不能具醫藥則中夜籲天斷一指煮湯飲母母遂愈人稱為馬孝子云

薛淋

按寧波府志薛淋字文時鄞人生而明慧從師授易即能領解已又學於余太史本問性命之旨造詣益深聲譽日起事父魁能順之於道父雅多昆弟而素性方執或有紛競淋彌縫調護久皆誠睦母董被疾宛轉牀褥者累年淋問醫請禱斯夕靡寧會省試輒謝不往母卒哀毀幾於滅性喪三年不御酒肉不內處與弟治自相師友推食更衣怡愉無間一女弟適李維勤早寡無子淋居去女弟宅數里日一往視更數年不衰字其孤女如己女至族屬緩急有求必委曲赴之曾無靳恤人皆稱之

董淑

按寧波府志董淑字宗順鄞人舉人鍾子鍾早卒淑以遺腹生稍有知見母感泣輒共其母泣黯黯繫母膝無須臾離稍長就外傳歸輒復繫母膝作嬰兒戲讀書夜央必入伺母寢撫衾褥安煖始睡母疾不解衣帶飢粥湯藥不以他屬事兄如事父未食不敢食勞必先承出納必受命二姊俱有疾淑視飭粥湯藥一如母次姊羸須人乳則日取妻乳并丐之鄰婦袖小器以飲姊數往返不替長姊卒郵其養子如親生丙午就試兄子以病告輒委行李而奔年四十二竟先母卒知者皆惜之

俞敏德

按寧波府志俞敏德字謙鳴定海人父彥華赴京聽選至高郵病故母唐氏在家亦故時敏德甫九歲力不能支日拊柩號泣聞於邑邑爲給費及貸以夫船始得扶柩以歸及長不樂仕進於三山建永思堂環植以竹哀慕久而不替有司屢以材薦以祿不逮親固辭不就號曰竹所先生享年一百五歲

王應麒

按寧波府志王應麒慈谿人年十七就學習文天性至孝倭寇卒至應麒扶母姜氏孀余氏奔匿鄰園賊窺見二婦輒拔刀迫之二婦亟赴池水余氏溺死應麒見母遇害以身翼蔽賊亂刃之子母傷甚賊退應麒隨卒姜氏踰數日卒

孫文原

按寧波府志孫文原字宗道慈谿人經明行修母王氏沒時授經於崇德聞計不限晝夜徒步而歸哀毀骨立父嵩病泄痢文原嘗糞甜知不可生額天求代刲股肉以進疾遂愈文原孝心純至惟恐人知或見其股痕即掩覆曰膏病瘡耳領鄉薦官都昌輒號哭曰祿不逮養食寧下咽耶清德懿行人多稱之

葉宗可

按寧波府志葉宗可通經博史工文詞登張信榜進士尋署刑部侍郎未幾以父老乞侍養歸辟爲郡庠訓導適父就戍宗可白于當道求以身代父得考終于家以薦授國子學錄陞助教剛介有守不苟交接祭酒司業而下皆敬憚之

謝矩

按寧波府志謝矩字原規與兄員皆好學能詩文矩

以父命爲人後員以博士弟子員郡從事轉臬掾坐事謫戍涼州矩嘗裹糧匍匐走萬里資送其身後以例籍父及妻子俱赴戍所獨矩以別籍免矩力請與偕抵吳門父以憂憤病死哀號痛毀俱絕或勸之火號泣不聽權厝父棺於旅舍抵京師適遇例放還復至吳門迎柩歸葬明年兄沒戍所計聞又開關數千里函骨歸附先壙撫其遺孤田廬悉以畀之

夏道昌

按寧波府志夏道昌世居月湖以漁爲業幼孤聽母教惟謹既長而漁擇其巨者奉母餘以供薪米費寒暑未嘗廢業母嗜茶家貧不能多蓄日以羨餘易之母得瘁疾申時必大作非沸湯沃之弗止道昌出以供湯沃無後時者每值佳辰令節及報賽之事必奉母出游母倦行則輒負而進或不愜意輒其背出血卽長跪祈請怒解復負之行一日漁於新莊之河得巨鱗里人厚與之直堅弗與里人怒遂毆之他老人怪而問故答曰歸以奉母老人禮而遣之尚寶衷忠徹異焉歲時伏臘必爲酒殽以燕勞躬爲執爵舉案及母卒哀毀不欲生有詔錫民孝弟力田者粟帛力辭弗受

鮑倫

按寧波府志鮑倫字孟彝甫七歲父鱗遊學吳楚莫知所向母孫氏撫倫稍長卽治買養母必得歡心朔望焚香哀禱願父子終相見如是者二十年忽有老人自慈谿來謂倫曰汝父曩與我客湖廣至漢陽東塢授徒贅婦生二女不幸死矣盍往歸其尸已而至慈谿遍訪老人不得乃從所指示詣漢陽跡之皆符

婦家懼有他意訟于縣倫情弗卽白繫獄數年縣上府府上監司監司謂疑獄錄有刺血驗骸事親按墓所發棺令倫咬指滴血直入枯骨其獄乃決倫卽買棺斂以己附體之衣訴乞歸葬監司允之表其空穴曰孝子塚監司卽慈谿顧英也前所與語老人殆天啓之倫至家人多感以陰陽術弗聽扶柩入堂苦塊哀毀不踰旬妻妾子女死者七人靡有孑遺倫心甘之卜兆葬焉越數年復生子女各一人皆謂仁孝所致云

徐瀟

按處州府志徐瀟字士澄遂昌人少業儒以兄商於外乃棄儒奉親親病劇晨昏焚香額天求代衣不解帶者經年居喪哀毀廬墓守制皆遵古禮家貧教授爲生操行益勵富道旌其門曰孝友

王應瑞

按處州府志王應瑞麗水人生員性砥廉隅行敦節義因親病額天刲股善撫孤弟撥腴田以供烝嘗恤窮困創義渡葺橋塗人多稱之

鄭濂

按處州府志鄭濂縉雲人性孝友善詩文代父往戍遼陽以不及事父思泣不置同游者呼爲望雲先生統兵者聞亦憐之令代還奉養益謹父亡哀慟成病卒

湯天祥

按處州府志麗水庠生湯天祥事親至孝父病癰而吸毒半載父壽致延母盛感而持齋三年母命繼永能爲人之難遂得天之易當道旌其門曰篤孝

王化民

按處州府志王化民字育卿麗水人蚤失怙母何氏守孀課讀弱冠名籍儒林事母孝得其懽心母年八十餘孝養不衰授諸暨訓導卒

鮑知仲

子坤原

按處州府志鮑知仲字絳叔麗水人性敦孝友幼侍父入京聽選舟渡黃河父溺焉仲躍身負拯踰水數里父子俱濟會母疾刲股療之兩親耄年同妻葉氏孝養備至郡邑以兩賢濟美旌之教子坤順早魁浙闈以刲股救親孝亦如其父督學嘉獎人稱世德以為孝行之報

楊泮

按處州府志楊泮字肇卿慶元人幼喪父甫冠補邑庠生事母竭力母病焚香祝天請以身代仍割股療之不忍離母側告侍養終身母沒泮慟側數日不食厝二親墳石皆躬負廬墓三載始歸母素畏雷每遇風雨往墳哀哭

李儼

按處州府志李儼縉雲人侍養父母承顏怡志父棠巡撫廣西奉母還姑蘇遇寇周旋盡瘁三載歸及應貢母固遣赴部家宰王公翺欲授京職以母老辭曰願歸養不願仕也乃與金華教授又辭王曰有此父乃有此子任從而志既居喪蔬食三年足跡不履私闕叔父榮劇疾儼就其室飲食之以便省視者三年繼祖母楊氏久患痰儼常手承之無難色時稱為孝子順孫云

樊迪

按處州府志樊迪縉雲人性至孝事父母承順溫清悉遵古禮雖薄味必親製以進母年九十終寢苦三年得疾骨立事父益謹同寢處垂三十年父百有三歲每延賓客為饌杖履矍然侍側父沒哀毀如喪母都憲周南傳其事

李大夏

按處州府志李大夏字允和縉雲人由增例入太學父任遼東參軍時遼東事初興大夏聞警萬里省視艱辛備嘗及至父患病累月大夏躬視湯藥衣不解帶及卒無力移觀撫按憐其孝破格給勘合還家服闋應選以母老弗仕竭誠奉養母獲壽九十二而終平生嗜山水好讀書所著有容膝齋集

葉儼

按處州府志葉儼字若思慶元人事親孝父心疾湯藥必躬進親沒時遭火衆競取財物儼獨不顧跪二柩側哀號遇人哀泣曰財物任取幸存親柩衆憫出之獲存

朱淡

按處州府志朱淡字德淵遂昌人性謹厚敦於孝弟贊父盼修築橋梁道路費以萬計殫竭心力父沒執喪如禮奉遺命重築王村口石橋卒成父志鄉里共稱之曰朱孝子

李未明

按處州府志李未明字覺初縉雲人銀臺鍵公子修飭品行無貴介氣幼補弟子員改太學官鴻臚不私干謁能紹清白風念親耄歸養委曲承志以孝聞

葉琮

按處州府志葉琮麗水人幼失怙恃事叔嬀如父母叔亡嬀陳氏性偏常伴狂逐之琮盡讓田宅自居外每旦暮必歸省如此者十餘年陳歿其子珣以前田宅讓還其兄自葬其母和睦之風藹然

吳一鵬

按處州府志吳一鵬遂昌人年十七同巷失火鵬在外念母奔回家已在烈焰中至則狂號突入火人以火勢正兇殺身無益力挽之一鵬大呼曰母死何以生為挺身而入火斷出路母子俱甦有司憫之白諸當道建坊以旌焉

潘沆

按處州府志潘沆景寧人謙厚業儒凡詩文過目成誦事母甚孝冬必以身溫被母卒家寒跣足督葬結巢於樹守之子琴成進士

李檣

按處州府志李檣字宗矩縉雲人早喪母與妻陶氏事父繼母楊氏曲盡其道楊屢非理責之退無怨懟一日楊責陶至鼻折流血被面次早省問如常儀楊為感悔遂允若

盧鶴鳴

按處州府志盧鶴鳴字仲鶴縉雲人五歲能誦記七歲父病立牀下達旦不寐日出則拜願減身年以益父壽父不藥哀毀骨支一如成人聞者異之事繼母曲盡子道事伯兄克讓遺金周旋患難敏學綜博試輒高等弱冠授饒慶困棘闈傾產營葬鬱鬱以不能顯親積疾齋志以歿京兆程正誼有言文章逼秦漢以上孝友居會閭之間

盧廷瑾

按處州府志盧廷瑾字叔瑜縉雲人善事父母言行恂恂好讀書知大義父病瑾視藥物日夜無少間臨危瑾入密室割左股肉脫暈絕人覺救乃甦以肉治體粥進一匕父覺氣和再進甘之病漸愈有孝行傳見諸牒知縣馬以孝踰今古表之

黃鐸

按處州府志黃鐸字仲信遂昌人曾祖道俊丞襄陽時以註誤下大理祖原照擊登聞鼓捶死鼓下鐸痛祖死非命乃建望雲庵塑像於中終身哭泣不輟嘗自題像讀有學聖賢學不能成道聖賢道道不能行儒衣儒履空負虛名惟孝惟友無辱無榮之語故以孝友名其堂至今稱孝友黃氏自號澹泊軒有遺稿

呂琅

按處州府志呂琅縉雲人性警悟好讀書至老不輟任建平丞有德政未幾歸年六十六值父喪時方近寒水漿不入口赤足履地四日而病六日而亡傷生減性賢者之過也其哀痛迫切迴出尋常遠矣

周豪

按處州府志周豪縉雲人家貧父久病醫禱弗靈豪祝天斷葷飲三年每夕焚香拜斗祈代忽一夜夢中若有告者曰園有肉可療病起索果得一鳥為羹而進父疾瘥發為疥豪日夜抑搔之妻屢勸治生怒出之父疾復作斷葷祈禱如初疾又愈後數年父終無葬具備身取直以葬廬於墓側越期終鄉人憐而葬之過其墓者咸起敬焉從子紋事父亦盡孝遇疾升

屋額天願代果先亡父壽竟至期頤皆豪德化所染云

杜珽

按處州府志杜珽字公遂縉雲人事母至孝有疾百治不瘥呼天請代乃陰剖股以進食果愈

蔣鵠

按處州府志蔣鵠字孔志青田人蚤喪母年十六侍父宦寓京師父卒扶柩歸葬廬墓凡一年數有虎咆哮馴遠墓木產白鳩飛鳴上下以為孝感所致著喪親記菊庵彙

張銓

按處州府志張銓青田人繇貢士為訓導為父吮癰人以孝稱強年失配不再娶人以義稱

高文昶

按處州府志高文昶字仲暘處州衛人誠樸和易力學安貧事親以孝著郡守移文遣幣旌之母病割股救療額天願以身代既葬停柩寢室夜半聞母大呼好看我昶驚須臾鄰家火起昶撫棺慟哭火至舍旁而止又葺離廬父母墓側虎夜銜豕遺之去人皆謂孝感焉後以貢任廬州訓導陞潼關教授子岡登鄉舉即致仕歸年九十餘鄉里皆稱孝德

鄭期進

按處州府志鄭期進字孔先縉雲人幼倜儻不逐兒戲嬉言動循古淹集經史務為力行弟子從遊者甚衆性至孝事父母先意承志柔聲怡色父感瘋疾斯夕侍藥衣不解帶者年餘疾革額天請代父卒哀毀三年不見齒廬東津墓側朝出暮返悲不自勝與兄

期達友愛五十載未嘗失容鄉里感其孝誼遇事趨質片語立定無敢以私干督學許公多於課士日詢定德行通庠合舉者六百餘人殆名稱其實云壬午齋志卒

單槐

按處州府志單槐處州衛人天性篤摯動履淳謹苦心力學授徒甚衆事母盡孝逮貢母年七十依依子舍不忍遠離母病躬親湯藥日夜忘寢右目失明冒霧渡溪延醫失足水中得漁人救之不死子熙載以恩貢授陳州同知博洽淳雅多吟味熙志鴻達俱諸生淳謹有父風

呂有音

按處州府志呂有音字大希縉雲人郡庠生誠中朴外言訥行方母早喪著陟屺歌百二十章又集古孝行一書喜賑貧乏其親戚有不足者每周之一日父苦水道病醫者云須以藥氣導入方愈否則不治有音泣下親以口試如醫言父病旋愈鄉閭稱之教其子皆騰聲庠序

徐鼎臣

按處州府志徐鼎臣字忠儒松陽人天性至孝總角時母有危疾額天割股幾絕若有人掖之乃甦母卒不起號慟廢寢食伯叔父強之進糜粥邑上其事院道交旌之服闋補弟子員以扶父櫬京邸勞瘁而卒邑人憐其死孝表其葬地為徐孝子墓

葉弘淵

按處州府志葉弘淵遂昌人少業儒每遭父病額天求以身代父六十妾生一子棄之竊取乳育成人至

分家產則曰俱父一體何肥瘠為典之均析後庶弟亦得例貢長兄早逝遺一孤撫字不啻己出又創家塾置學田建義店以宿行旅其善行種種足稱焉

馬璉

按處州府志馬璉字宏器縉雲人性至孝父嘗有疾璉衣不解帶焚香籲天祈以身代父歿哀毀莫任負土築墳目程其力日致四十擔久廬墓側人名其墓曰孝子墓

樓景明

按處州府志樓景明縉雲人父疾革封股和羹以進籲天祈代父疾愈及卒停柩中堂鄰有火變號天大慟火隨息後舉孝廉知魏縣政尚寬厚縣有蝗景明齋戒禱於城隍不為害致仕歸日嘯味山水間

鄭友仁

按溫州府志鄭友仁樂清庠生篤志業儒天性孝友年十三時封股愈母病邑令胡汝寧上其事旌之

楊彥

按溫州府志楊彥樂清人性誠直自號率人嘗爾足千里白其母余氏之節詔給銀三十兩樹綽樸彥拜恩曰吾母榮矣敢私君之賜耶盡以分鄉鄰之饑者而自出貲以樹聞者多之

呂仲珉

按溫州府志呂仲珉永嘉人徙平陽父邁危疾珉焚香籲天灼臂求代後八年始歿蔬粥廬墓兼好施予官給粟帛旌其行

黃鍾

按溫州府志黃鍾字應律永嘉人母病劇祈以身代

兄弟五人同居白首無閒言嘗有盜竊其莊上物僕獲之盜驚妻以償鍾還其貲令贖又賦詩慰遣之所著有松月軒集子一鵬任武寧令

徐思

按溫州府志徐思字明澤永嘉人給諫安行孫也喪父廬墓母病衣不解帶封股和劑致異蛇之應視弟友愛不分析者六十年里有義舉率以身先

葉瀚

按溫州府志葉瀚字宗默永嘉人幼孤事母病愈久不懈妻稍違母意出之事孀嫂如母撫孤姪如子教之成立邑令旌其門曰孝友

王一柱

按溫州府志王一柱字世祿樂清人孝義性成嘗遊學遠鄉每思親即負篋歸母卒哀毀成禮父病衣不解帶者數月及葬廬墓左朝夕痛哭遇歲饑即出粟以賑族人之貧者所著有燕餘集邑令張旌其門子詰甲午選貢

盛君協 王世明

按溫州府志盛君協王世明俱樂清人親病皆嘗羹終皆廬墓盛棄官歸養王有風水圖

葉維翰

按溫州府志葉維翰字仁熙平陽邑庠生父純實宦南頓感風疾翰時年十三封股煎湯以進疾遂瘳邑令郭道隆上其事歲齋粟帛旌其家母周氏病篤願減算以益母壽刺血書疏遍籲各神母尋愈後翰壽八十四

周尚穆

按溫州府志周尚穆平陽人訓導光之父父伯康病篤焚香於掌封股肉進之遂愈

黃道琳

按溫州府志黃道琳永嘉人家貧傭力養父父病篤封股和藥以療

余夢龍

按溫州府志余夢龍平陽人父世卿病篤龍方弱齡封股和羹以進疾遂瘳邑令洪啓哲上其事督學黃鳴俊旌獎歲給粟帛

戴天倫

按溫州府志戴天倫字仲明永嘉人父病須灸天倫灼以分痛母病癰以口吮膿而愈有王某者不能斂以己棺讓之舉鄉實壽百歲

南孟明

按溫州府志南孟明永嘉人父文相以荒穀事罹罪孟明方弱冠挺身代父備受痛楚事白郡守劉芳譽褒其孝

張崇翰

按溫州府志張崇翰字承環永嘉人徙樂清性至孝侍繼母疾不解衣者二月有異母弟六人友愛均篤及親歿二三尚幼悉力撫字稱貸以畢婚娶內外無間言以子德明貴封刑部主事踰峯卒

張芝芳

按溫州府志張芝芳永嘉人少孤母嘗病日侍湯藥祈天減算以益母壽復承歡二十餘年及母卒哀慟數絕有司嘉獎

王欽穆

按溫州府志王欽穆永嘉人父至京以中書謫戍閩省穆年十二詣闕上書朝閱其孝為復父職後郡邑屢請旌之

朱元晏

按溫州府志朱元晏樂清人事母至孝母性嚴晏年五十常受笞退而擊鮮池上寒僵誤墮水母疑其受笞而溫益大杖之晏終不敢辨妻被讒不悅於姑晏屏不相見者十餘載寢處常在母側後以歲貢行母始悟召其妻為姑婦如初晏行至中途倏念母遂棄牒歸

薛必光

按溫州府志薛必光平陽人少孤年十三事母及祖母盡孝備作以養祖母卒鬻產供喪事母病刲股以療及卒柩在家倭寇掩至空村避去光獨守母柩不避賊亦不入人謂孝感所致

季養

按溫州府志季養字彥良瑞安人親歿廬墓逢諱日輒不食嘗購先世散佚遺文求以表彰對人言輒泣下人哀其志

蘇祀

按溫州府志蘇孝子傳孝子之事親也死而後已予居父母喪如不欲生天日忽改非復人間世也鈍齋翁曰鄉之孝昔稱仰忻陳宗焉為其思苦而廬墓也今復見蘇君子曰古不防墓事主如事生吾何從哉於其思焉已矣蘇君如何曰其父鼎八十而疾醫者曰無能為矣蘇曰奈何請於帝乎吾壽幾何請捐與之十年父則九十予曰有諸果哉吾弗逮矣又曰其

母李九十而患足摩之洗之藥之日夜弗間大雪不寐病於其寒乃死予悲曰孝子之志終矣雖然禮敬為大瘠期下而况死乎立身以揚名父母之志也不有其生如志何又明年御史雲川舒公令有司祭葬之匾其門曰孝義為之傳曰蘇君名祀號友竹幼讀書慕仰忻陳宗之行不通聲利樂施予分口給以濟貧人父母濱死惶惶無之願捐年歲以延父居喪哀毀結廬墓側母病竭力事母母得生蘇君死焉年五十有八鄉人傷之御史旌其門嗚呼君弗仕而名亦揚孝道成矣

姜約弟綱

按溫州府志姜約字子充姜綱字子斐俱瑞安廩生以古道相期許事親備孝養兄弟燕見如賓斗粟尺帛未嘗私入親歿廬墓三年約以貢卒京邸計聞綱朝夕哭及輓歸數日綱亦飲痛而卒

葉世愛

按溫州府志葉世愛字友敬樂清人自幼祖呼為順孫家貧出遇甘旨必懷以遺親親病時多蚊乃裸臥其旁以身念蚊咤莫不及親親不食亦不食妻歿或勸之娶曰男子失義何以責婦人乎

章友善

按溫州府志章友善平陽人父成高在海塘虎攫之友善疾馳而前以拳毆虎手筋骨盡露虎棄去父得活

陳厚

按溫州府志陳厚樂清傭人也居近海得鮮必還供母母病盡衾寒以身溫母及死殯山谷間逢雨夜衣

蓑衣往臥柩側一日外出夜半聞暴雷即奔赴柩所

謝孝章

按溫州府志謝孝章末嘉人少失母事父最孝父歿三年蔬食及葬廬墓側三載如初喪

何小二

按溫州府志何小二樂清人年十歲父為寇所繫貧不能贖小二請往代母固止之泣曰父歸則舉家可活否則俱死耳遂竊往得父還小二竟不知所終

謝廷俊

按溫州府志謝廷俊瑞安人父歿貧未能葬鄰火將延及廷俊他不顧獨伏柩呼天而泣俄而風返火熄子伯恭亦以孝聞

趙漢規

按溫州府志趙漢規字獻可樂清人為諸生貧甚奉母菽水盡歡得餼廩分半與兄以選貢歷任學博引病休致邑令胡用賓延為鄉約長藩臬王應顯朱天球廉其行詒造廬禮焉壽九十著有東崖集

項愛親

按溫州府志項愛親字允孝瑞安人貧家灌園易甘脆為養顛沛不廢定省每祀先必齋戒越宿舉蜡賓

欽定古今圖書集成理學彙編學行典

第二百九卷目錄

孝弟部名賢列傳二十一

明十七



徐子夔	方烈	胡安國	俞守正	陳璵	邵允宜	王冕	朱助	倪大海	方希成	徐洪	劉怡	張懷禎	楊錚	施新	徐拜遜	袁洵	洪美	丘鐸	應練	張疇	余啓	楊瀾
鄭德宏	邵明理	徐文斗	俞爾濱	許嘉賢	陳弘志	金洪	潘琢	王世名	龔曇	徐公遷	方惟素	汪璉	程本	陳恩	張夢徵	朱倖	章士麟	戴守溫	李翀	蔡智梈	林元	陳大名

薛常生	陳理	周元齡	王舜周	邢浩球	張玉	邢魯	求尚梁	趙嵩	朱孔禮	俞梁	徐子時	胡楨	沈良璽	徐錦徵	邵弘襄	孫文	趙璧	何時化	張珏	任元齡	徐今禧	徐明徵	丁應正	郁士渭	胡楫	劉德立
聞思嚴	薛廷玉	錢守家	屠時伸	袁聖	金廷榮	錢瀛	姚祖阜	錢善性	應溫遠	夏子明	盛泗	鄒大績	沈鎰	方之瀚	孫有聞	孫一鳳	張震	張瑞虬	鄺逢新	任亶斐	徐世英	任師禮	王地	黃亨	王鑾	張惟明

徐敦	徐子恆
曹同德	徐一誠
徐承清	張自偉
陳泰交	徐繼科

學行典第二百九卷

孝弟部名賢列傳三十一

明十七

楊瀾

按台州府志楊瀾字東之號若山爲郡諸生以謹慎聞父母性嚴且好客瀾事之惟謹每客至必極力營脩醕父後喪明瀾左右扶持曲意取歡愈久弗懈撫諸弟妹有恩每以己貲給公費父悅之謂諸子曰汝兄孝子也一日置酒侍父忽遘寒疾卒人咸傷之

陳大名

按台州府志陳大名字子顯父萬伯以事卒於杭大名扶輿歸重不可行夜宿神廟禱曰大名力殫財盡願輕而易舉質明果輕輿下有鈔十錠人以爲神所錫歸葬廬於墓側朝夕悲號不茹葷者三年後以薦任豐城知縣

余啓

按台州府志余啓字元明幼失怙事其母鄭克盡色養時家有滇南之役二兄議行未果啓毅然曰二兄

皆有嫂氏不可行吾當代之行備嘗艱苦閱三年乃返

林元

按台州府志林元字用白性至孝年十三父病醫者莫能療元刲股作糜以進夜則稽顙北辰願以身代越數日父病良已刀痕亦隨以復人謂孝感所致居常供養之需皆潛自營辦不令父母知其難也會歲饑富家射利閉糶乃攜古器物往他縣易米即負歸以供二親如是往返者凡數四比秋則喜曰吾父母自今可保無虞矣二親卒頓擗幾絕既葬月朔必至墓所號慟徘徊不忍去李都憲匡爲作孝子傳

張疇

按台州府志張疇母徐年八十六病牀褥者三載疇旦夕扶持至以手掬其穢衾稠必日澣之令潔乃已以貢授六合教諭

蔡智梔

按台州府志蔡智梔字元丁天性孝友甫十歲母卒哀毀如成人父有疾躬調湯藥衣不解帶父卒奉祖母備極甘旨晨昏定省數十年如一日其先五世合食既而中析智梔乃與弟智諄承其父志合族人數千指同居共爨尤輕財樂施姻戚貧者賑之死者葬之立塾延師以教里人子弟歲出粟數百石代之輸虛稅義聲翕然

應練

按台州府志應練字茂習天性至孝事父母無疾言遽色飲食必躬饋晨昏定省無少懈父母有疾惶懼求藥願天祈以身代卒則哀號幾絕不食者三日居

喪一循古制三年間泣血不止親墓產瑞芝盈把人謂孝誠所感云

李翀

按台州府志李翀幼習禮經父清宿州判官卒於任翀扶柩還盜欲剖之翀叩頭流血曰破吾柩寧破吾腹盜感其孝奪衣裳而去母陶氏遭危疾醫謂非人肉不療翀刲股作羹以進之母疾漸蘇比卒苦塊一如禮歲時忌日必齋素涕泣自號其室曰思齋陳太守勉以哀不可過更曰輟思作孝行傳紀之

丘鐔

按台州府志丘鐔蚤喪母事父極孝父年高無齒鐔取魚肉之精美者製爲丸餅以進比父卒遺命葬祖塋側去家遠而歲歉費鉅鐔極力營葬卒如父命鄉人稱其孝云

戴守溫 洪美

按台州府志戴守溫名瑱少孤事母極孝母病醫者曰得鯽魚和劑可愈時隆冬守溫解衣入水捕得之服果愈母沒哀毀過常尋以疾卒貧無以葬邑令袁公道爲營塚於小唐嶺之側題其墓曰方岩之北唐嶺之南孝子之風流千百年同時有洪美者泉溪人也嘗割股以愈母疾袁公嘗舉充鄉飲賓云

章士麟

按台州府志章士麟字祉盛少篤孝義慕陽明先生學凡言動取與無不準諸道義廬墓三年時切哀號忽墓產異竹同本而生人以爲孝感所致

袁洵

按台州府志袁洵號月川父沒母哭病目洵供湯藥

聚順者二十年二兄一弟不克自贍女弟貧不自給出所有衣食之以安母心一時族黨無間言屢舉鄉飲以恩例受粟帛之賜

朱倬

按台州府志朱倬性惇樸少業儒不就躬耕孝養二親父歿廬於墓三年朝夕悲號遵疾而卒

徐拜遜

按台州府志徐拜遜魯府典儀紹先十五世孫父疾嘗糞禮斗求代二親繼喪齋素廬墓六年司寇大猷祠部陳錫有墓志表記

張夢徵

按湖州府志張夢徵歸安人父組南京工部郎中方病疽青陷作嘔逆皆惡証夢徵年十三吮疽得膿輒嚙展轉疽畔審視顏色後漸以瘥

施新

按湖州府志施新歸安人敦尚嗜修弟震以催科殺人法應抵罪新念母愛所鍾以身代之會赦免

陳恩

按衢州府志陳恩字廷受領鄉薦北上聞父疾遂不終場奔歸得侍湯藥躬殯殮其在南雍時夢母疾遂徒步以歸兩足重繭母疾竟瘳咸謂孝行所感

楊錦

按衢州府志楊錦添之曾孫兒戲即習定省儀長不染貨利在胄監時忽心悸過歸父吳果疾越十日卒後以母老竟不赴選母病三年非迎醫未嘗暫去左右及卒哀毀骨立以沒孫梁登進士第

程本

按衢州府志程本字邦寧性至孝親瘠百計弗療乃割股和髓以進遂愈親沒執喪哀葬祭以禮鄉里以爲難大學士商輅爲作墓銘

張懷禎

按衢州府志張懷禎字應祥父邦達任知縣有罪當刑伏闕陳情乞以身代上悲憐其意俱釋之尋陞邦達監察御史

汪璉

按衢州府志汪璉字致用天性孝友與兄同赴鄉舉見兄文不優遂買舟歸母程氏年踰九旬晝夜侍奉終始不懈喪祭悉循家禮鄉黨言孝必以璉爲首稱笏山先生誌其墓

劉怡

按衢州府志劉怡父疾不能動履二十餘年率其季懷廣悅輩朝夕侍奉父或忿輒長跪自撻暇具珍美延所愛以悅其心及卒尤能致禮事繼母以孝撫諸弟以友郡守林以怡睦鄰其堂

方惟豪

按衢州府志方惟豪年壯時寇犯境父義奉官守禦挺身往代事母愛敬母疾爲之躬進湯藥建橋東溪禱福南華又割股餌飲母疾遂愈

徐洪

按衢州府志徐洪字裕卿孝友端方問學該博宿州大饑多方賑濟民賴以安鄰治有冤獄願詣宿辨明年方強仕因母老致政歸養承顏順志友愛諸弟

徐公遷

按衢州府志徐公遷字安之幼游鄉校苦心問學以

親老授唐府典膳未幾疏歸終養侍奉二十餘年怡顏悅色曲盡子道待異母二弟尤篤恩意妻家給田百餘畝盡以歸之貧民假貸焚券不索潛泊自守橫逆不較

方希成

按衢州府志方希成生甫八月失父抵成立事母節婦汪氏曲盡孝道母終哀毀寢柩側葬祭咸如禮

龔曇

按金華府志龔曇字汝霖性至孝年十七因父演病躬侍湯藥衣不解帶比卒哀毀殯葬如禮事母尤謹幾四十年母卒廬墓苦塊飢粥奠獻悲號三年如一日有司以孝聞詔旌表其門賜八品官復其家後配享末墓廟

倪大海

按金華府志倪大海祖病日夜侍奉不離側焚香告天願減己齡以延祖壽後祖年逾九十乃終大海哀毀踰禮廬墓三年繼母李患癰吮之而愈及沒廬墓三年值歲饑餓者施粥死者施棺仍割田儲粟贖其族人其有司具奏旌其門曰孝義

王世名

按金華府志王世名字時望幼有大志言動以古人自期萬曆丙子年十七其父爲族人毆死訟於官欲檢其父屍不忍欲即死以報不可不得已與讎和受讎百金及諸所贈遺一一封置繪父小像已佩刀侍懸之密室朝夕焚香泣拜鑄一刀銘之曰報讎刀集忠義格言一冊以自勵三年補邑弟子員又三年得子喜曰吾可以死矣一日給讎入蝴蝶山揮刀斬其

頭祭父取前所封置詣官請死官憐其孝欲檢其父屍以生之世名曰吾不忍毀父屍至此遂以首觸墻澣血赤地死面色如生是日風雷大作滿城哭聲震天金華縣令汪大受爲之立傳其妻俞氏矢志同穴撫孤三年而殉之事聞詔下旌其門曰孝烈之門府從祀鄉賢縣有專祠縣令陳公大烈表其里曰孝里大司寇王鳳洲爲之傳

朱助

按金華府志朱助字士貞天性孝友母卒廬墓孝感三異家燬回祿而師萊堂匾出煨燼若新一也盆柏蒼枝致黃鳥馴而不驚二也家有母大病瘡其兒銜食食之三也兄士安謫戍麻陽歲具衣錢供給每出粟貸貧不收其息里中有甲當償乙者輒代償之其他善行亦多

潘琢

按金華府志潘琢字時循純孝鄉人性孝友不私妻父喪毀瘠骨立酒肉不入口者三年母患瘋痺琢衣不解帶痒疴痛楚隨意搔摩梳洗火水皆親理之母久臥思起乃制軟輿與弟昇之惟其所適如此者七年母沒哀痛幾死既葬廬墓九年人皆稱其克盡子道云有司延爲鄉飲大賓匾其門曰孝行

王冕

按金華府志王冕字公亮居貧養親誠至母卒廬墓三年知縣張立嘗雪夜往祭之果見鳴咽僵臥大加嘆賞給俸助之聲稱大著太守劉渚大書孝行之門旌之仍復其家丁役

金洪

按錢塘縣志金洪聲如里人竭盡孝敬嘗割肉愈母疾及沒刻木像工人以血料塗塑洪曰奈何以猪血汚母身刺臂血盈盂周塗其像朝夕奉祀一如生時忌日悲號哀動鄰里

邵允宜

按富陽縣志邵允宜字仙谷性純孝甫離提抱即能循古孝子禮扇枕溫衾父母異之髫齡失侍事繼母如母遇鮮果進母啖乃敢嘗父五泉鄉進士仕華亭雲和教允宜綜理家事課賦獲勤耕織賴以克濟及父歸田家居二十年念親耄咫尺不離酷暑嚴寒潛侍親牀側候親熟寐乃休親嘗咳又在旁問安服父喪年已六十有五苦塊不御酒肉三年幾骨立子二長起元早卒允宜教孫允篤以孝友讀書傳家爲法其急人之難焚券契完人夫婦履歲開廩賑饑村落全活不至爲亂皆曰賴有孝子到今人猶思之

陳弘志

按富陽縣志陳弘志字君任號玉筍良棟曾孫博施子也生而穎異甫能言詩書成誦七歲失怙居喪哀毀若成人鄉里咸異之年十五補弟子員博學強記行文以古人爲法母病終夜露禱其妻施氏亦割股和藥以進病遂愈撫幼弟成立後析爨志僅割居之半而以其產悉推與弟年六十四卒

陳璵

按富陽縣志陳璵邑廩生性純孝母鄭氏沒擗踊嘔血幾減性及葬廬墓三年

許嘉賢

按富陽縣志許嘉賢字心賓屠山里人少攻舉子業

及長重然諾樂施與里黨多賴以舉火性至孝事親色養備至父煌嘗疾篤夜禱天願以身代割股和藥以進疾尋愈後煌沒哀毀弗勝結廬墓旁朝夕問視一如生越數年每見手澤輒流涕嗚咽不出聲其依孺慕終身如一日

俞守正

按臨安縣志俞守正年甫十三兵至同父一觀被執兵殺一觀見正爲童子欲挾之去正泣告曰父死子義不獨生兵并殺之

俞爾濱

按臨安縣志俞爾濱生員俞可鉅子係前妻盛出也甫週歲盛亡鉅續娶方氏越一載鉅又亡濱事繼母至孝兵至方閉門經死濱繞母屍而哭亦爲兵所害

胡安國

按臨安縣志胡安國生員初家貧甚父存義沒於京安國方齡年聞計大慟辭母即起行奔喪隻身至京負父骸骨歸士論贈之

徐文斗

按新城縣志徐文斗琪縣知縣徐慶餘子隨父之官署時流寇掠城邑琪縣失利文斗見父被執請以身代賊並磔之

方烈

按昌化縣志方烈十二都人性朴茂嘗割股救療親病居喪侍養咸以禮著奉旌篤孝

邵明理

按昌化縣志邵明理以孝事二親親疾顧天祈代奉湯藥日久不懈邑令申旌

徐子夔

按昌化縣志徐子夔字九修以邑學生入太學初授亳州同知有惠政陞北京東城兵馬司指揮慎官箴却例獻廉介自持遷岷藩長史或以進取說之者夔曰我任藩官猶患勿稱敢他望耶遂致仕歸夔純孝天植父母病憂形於色父沒哀毀踰禮生母早喪奉嫡母許色養無少違許亦甚慈母亡泣血三年不入燕室敬愛異母兄子英七十年如一日敦厚姻族恥言人過尤有助學田賑饑還妾助喪諸義蹟族黨稱之卒之前一歲臥榻上見牖外事從甚衆一人執紅東上書恭迎西湖主者尾註一己字若將迎夔狀夔悉以所見語妻子且曰吾明年四月殆將死也已而果然

鄭德宏

按昌化縣志鄭德宏邑南峽川人生有至性年八歲即能割股療父疾疾果愈德宏遂終身齋食祈延之奉撫按旌表

劉德立

按昌化縣志劉德立家貧事父至孝力給甘旨靡缺及侍疾苦營醫禱夜不解帶父沒奉後母如生母撫幼弟如同母弟其篤行有過人者奉例申獎

張惟明

按山陰縣志張惟明膺拔貢例晉太學念奔馳南北不克承歡遂棄科舉一意孝養父母有疾衣帶不解藥必親嘗竭誠祈禱親疾危而復安及父母故皆廬墓三年有白兔往來枯杖生枝之異巡撫谷疏題建坊題其門曰孝行之門

胡楫

按山陰縣志胡楫字汝舟父業儒攜家都下楫備書以供饘粥父卒竭力事母母素病膏焚香請以身代及爲銓曹吏出任萬載縣丞一夕夢母有疾遂掛冠旋接家信果於是夕母病乞終養部例不可尋晉秩金吾右衛指揮僉事日侍母側母壽八十八歲卒刻木肖像事之

王鑾

按山陰縣志王鑾號戴阜少孤事母最孝母病親嘗湯藥衣不解帶每祝天願以身代母卒既葬即築墓旁九載不歸親友有勸之應試者辭曰得安父母之墓足矣他非所望有司聞其孝而嘉之至老又築數椽於墳右人稱王氏風木庭迄今猶有遺跡子望久望大事祖母亦盡孝

郁士渭

按山陰縣志郁士渭貧甚因父死他鄉乃托鉢遠行負父骸骨以歸又割股救母恙孝友過人奉旨建坊旌表

黃亨

按山陰縣志黃亨里之弟也隨兄宦雲南里既被害寇方肆掠亨痛忿兄死即率衆百餘與寇戰勇氣百倍寇不支潰去亨亦傷其左目瀕死抱兄骨歸葬於鄉論者謂里死官而亨破寇報國且報其兄忠義萃於一門當應褒卹惜未有以其事上聞者

丁應正

按蕭山縣志丁應正字東阜入國學以才稱父楊春久病不起刲股療之無效乃於元朔夜禱諸神願以身代家人莫知也父病痊應正遽逝喪殮後出其書篋得疏稿則爲祈神代父之詞合境嗟異遠近聞之咸歌頌其事至今稱丁孝子焉

王地

按蕭山縣志王地字惟寧穉穉失恃即知悲慟寐中嘗作呼母聲人異之及長乃曰吾不逮養母猶逮養父遂志體兼承冬夏晨昏動循古則兄弟析產推肥受瘠

徐明徵

按蕭山縣志徐明徵字晉台性孝友蚤孤父病時思食芟非時不可得後見芟必泣下不食舉孝廉乘輿渡江輒曰此吾父奔走力食道也何忍安車過之耶往往下車走非公事不見邑宰公車不受驢尤當時所罕也授慈谿教諭未任而卒戒子孫喪不得用鼓樂祭不得用浮屠至今遵之子振聲亦以孝友聞于鄉

任師禮

按蕭山縣志任師禮有孝行祖母沈病篤刲股和羹進之得愈邑侯頌其廬曰代親盡道爲上其事臺憲膺旌獎焉

徐今福

按蕭山縣志徐今福廣西僉事官孫貢生震士父也世傳清白禧尤以古處自期壯年失偶不復娶謂人曰曾子不再娶有子元也吾竊附此義庶不觀閭氏之戚耳遂躬操井臼以養母中裙廁踰躬爲洗滌雖室無斗儲然非仁者之粟不以食親也

徐世英

按蕭山縣志徐世英字步瀛素以儒行著母周氏罹篤疾號天請代刲股和藥進之母立差母終負土營葬廬於墓側開義學以授生徒王侍郎三才爲之贊曰刲股毀肢韓昌黎有鄆人之對然孝子之心何所不至不得已而顧天請代不得已而刲股和藥乃至負土乃至廬墓則刲股者所謂嘗鼎一臠而知全鼎之味者也邑令上其事給匾旌焉

任元齡

按蕭山縣志任元齡字九如入太學有聲父朝諱爲郴州參軍以桂藩工獲譴有司奉旨逮家屬弟九齡已被逮元齡時在遠方聞之星馳詣獄曰家有長子是爲家督願以身代父備受酷刑終無異詞當事者憫之爲併白其父冤子雲蛟

任直斐

按蕭山縣志任直斐年甫十餘歲有土寇圍其家索其父雨蛟直斐詭詞免其父斐遂遇害邑令王吉人旌曰孝子

張珏

按蕭山縣志張紱子珏字良毓嘗佐父發粟賑饑捐銀代輸歲課巡撫劉題旌亦授即秩大父目盲躬舐之復明母朱氏被火冒焰出之頭額俱爛父喪哀毀而卒太傅屠濬題曰承事郎義愍張孝子之墓大學士商輅爲之傳珏子維翰號幹山克修世德由諸生立功任揚州指揮使

鄭逢新

按諸暨縣志鄭逢新字鼎生邑庠生性至孝經史過目不忘九歲母病劇割股救禱願以身代事繼母尤

篤聞父殉難永州偕兄逢時酒泣扶柩值寇兵阻隔未遂而歸時繼母病篤號哭者數日夜奮然曰母若弟任之兄永州之行任之弟遂開關萬里匍匐達永哭訴各憲得荷具題扶柩歸家竟以病屏嘔血支牀飲泣慘額日劇及聞恩贈命下卽撫心長慟曰兒事已盡死復何憾遂殯有司上其事旌獎屢加焉駱念庵贊之曰忠而死孝而死死等耳鄺生賢士赴難湘水伏闕帝里枯血肝趾病終不起父也如此復有厥子嗚呼難矣豈非其實行可傳與

何時化

按諸暨縣志何時化字成之性至孝讀書通經史嫻文藝以父母年老堅不就試惟溫清爲事值母許氏病篤焚禱割股救愈父母皆得享大年人咸謂孝感所致二親既沒廬於墓三年里鄰舉於縣縣令旌以額東陽許少薇製文述頌三子起元起鳳起麟皆孝友時嘖嘖爭羨有乃父遺風

張瑞虬

按諸暨縣志張瑞虬檢躬醇慤天性最孝奉親必敬親不食不先食親有疾湯藥必先嘗而後進及二親亡扶櫬入里西山廬墓三載自力於山以供粢盛食有餘悉給於父母所識之貧乏者斷酒啖齋絕足井里時見虎環其廬蛇蝎遶其榻弗畏也通里呈憲疏請旌表

趙璧

按諸暨縣志趙璧庠生性最孝父母疾篤割股以進果效迨父母逝廬墓于艮山三載有攜而餉之者僅啖其一物餘謝之蓋以啜粥之下不忍醉飽也未一

年鬼現光以乞食盜潛蹤而過門一方化之凡有服齊衰者不復近聲色咸知孝弟當道俱有碑記

張震

按餘姚縣志張震農夫也父爲人所陷將死震方周歲嚙其指曰某吾仇也汝毋忘報震長指瘡不愈母以父言語震遂以報仇二字日誦於口同伴有諸暨人曰汝力不及吾爲汝殺之未幾仇乘馬出諸暨人以田器擊死莫有知者震卽走父墓所跪告曰仇已復矣遂發覺官憐其志減死論戍遇赦歸

孫文

按餘姚縣志孫文父爲同族孫時行篋死文尚幼卽刺臂爲恨銘二字見時行卽欲手刃時行固諸生知力不敵遂修好時行與之武斷鄉曲時行坦然不疑而文每朔日禱於關壯繆問仇可復乎神不許者數年一日入禱神許之遇時行於田以田器擊殺之自投縣獄縣以無告者不收文抵死不歸三日而時行之子至郡縣憐其志坐謫戍文投牒願死遇赦出

孫一鳳

按餘姚縣志孫一鳳侍父疾衣不解帶者歲餘父沒廬墓三年白雀來集人以爲孝感

邵弘裘

按餘姚縣志邵弘裘字治君年十一歲母徐氏病危弘裘割臂肉投之湯藥母病尋愈日就外傳而臂瘡臭聞傳問弘裘泣言其故由是家人始知之其後母死朝夕思慕不置手書法華經以寄哀蓋童子中之有至性者

孫有聞

按餘姚縣志孫有聞字子長如法嗣子也年十五補弟子員時父從貶所歸瘴毒發舛如湧泉百藥不治有聞籲天泣禱祈以身代及沒痛絕復蘇結廬墓側晝夜悲號山多虎夜常繞廬不相驚久且避去人嘆異之光宗嗣位赴闕伸父忠疏懇哀切上感動贈官賜葬陰母史氏性嚴厲能曲意事之常得懽容史隨寢疾妻來氏方產絕兒乳哺姑至羸不能支而卒有聞傷感不已遂終身不復娶母再病醫禱備極惻居喪哀毀面黎如墨後承廕就選授典簿光祿遷戶部主事綜核詳明節省帑金數萬以疾告歸又能樂善好施成親之志年七十而卒遺詩文八卷

徐錦徵

按餘姚縣志徐錦徵字符一童年失恃事繼母撫繼弟備篤友于人以閔子目之析爨時貲悉歸弟晚居南城鄰室兩患火人見所居有神人終袍端坐獨得無恙僉謂天佑孝友云

方之瀚

按餘姚縣志方之瀚庠生事母孝母病割股救療

沈良璽

按餘姚縣志沈良璽以孝友聞璽子金和割股療母旌之

沈鏜

按餘姚縣志沈鏜母葉氏病割股療之

胡楨

按餘姚縣志胡楨節婦何氏子也事母至孝頃刻不忘鄉黨飲酒每食必數起視母筵中之物亦必貽母娶妻毛氏供奉稍怠楨叩頭乞逐婦毛亦搏頤自責